

Churer Schnudergoofa

Ausschnitte aus dem Programm 2012

Vum Sand zum Priaschterseminar, händs baut - as isch a Hohn -
dr Stairway to Heaven, dia tüürschi Schtäga vum Kanton.
Dass' jetz schu total innaseicht, zeigt nu wia Recht miar händ:
Das Bauwerk und dia Planer sind komplett inkontinent.
Saniera khasch vergessa, he, dr Schtutz isch mega knapp,
drum hät dr Dünner vum Kanton an lifall, do ligsch ab:
Zum Thema „schiffa“ falli im a super Schponsor ii,
d'Firma Pampers packt die Schtäga in a Windla ii.

Dr Bischof Haas isch Horror gsii, miar händs vor füüf Johr gsait,
und mit am Huonder hät üüs Rom nomol an Eili glait.
Verbütet alls, tenkt negativ und schpiilt dr neuu Bäsa
fehlt nu no, dass er d'Mess morn in Rumantsch Grischun will läsa.
Dabii brucht d'Kircha jetz Events, a Ravermess wär geil,
am Bahnhof gäbtis a Mac-Biicht für ds schnella Seelaheil.
Am Schluss vur Mess schreit jeda Pfaff mit Innbrunscht ins Gebäu:
„Die zehn Gebote wurden präsentiert durch Calanda Bräu“.

Am letschta Fritig händs na gschnappt uf dr Masanserschtröss
Mim Kharra beidi Schpuura bruucht, dr Tschugger meint: „Do, bloos!“
Au im Urin hät sich khai Alkohol nowiisa loo
Dr Tenchio isch nid bsoffa gsii, dä Typ fahrt immer so.

Trink, trink, Brüderlein trink, lass deine Lancia zuhaus,
trink, trink, Brüderlein trink, am besten mit Bruno W. Claus
Meide die Strassen von Weihnacht bis März,
dann ist das Leben ein Scherz!

Dr Nostradamus häts schu gwusst, dr Martin Luther au,
und d'Züüga vum Jehova kennend ds Datum ganz genau.
Sit kurzem weiss es jeda Nock, Ends Johr isch Sendeschluss.
Dr Untergang vu üsara Welt, latiinisich: Exitus.
A Horror, wemma sich das tenkt, was khunnt alls uf üüs zua?
A grausami Vision, die lot da Gmeindröt z'Khur khei Rua.
Dass jetz dr Leibundguat, dr Tom – das tarf nit möglich sii,
wird bis ans bittara End vur Welt, der höchschi Churer sii.

Miar händ üüs imna Selbschtversuach a paar Erreger gschprützt,
Zerscht Vogelgrippa, Thyphus, Scharlach, prompt hät das schu gnützt.
Noch'm Virus wo Demenz und Grössawahn uuslöst ischs guat:
Jetzt wüssend miar wia sich dr Christoph Blocher fühla tuat.

As isch nit nu dr Grössawahn, wo üüs am Blocher schtöört,
dä Typ hät ds AKW-Syndrom, dass dää nit endlich hört.
Au inn khasch halt nit schnell abschalta, muasch na, s'isch zum Brüala,
ganz langsam obanaba fahra und Johzehnti küahla!

Acht Johr lang hät üüs d'Calmy-Rey mit iarer Fritta quäält,
wia wirsch mit soma Zaus am Hirn zur Bundesrötin gewählt?
Vor Wianacht hät jetz ds Parlament beendet dia Tortur
und mit am Alain Berset eina gwählt ohne Frisur!

Bi üüs bisch du schön, denn du bruchsch khei Föhn,
Bi üüs bisch du schön, jo so schön.
Bi üüs bisch du schön, was meinsch, wär's obszön,
wemmiar üüs das au schniida löön?
Verglicha mit dr Michelin häsch du zwei Mool meh Gsicht
uf dini Riiaschtirn sind alli Fraua-n-erpicht.
Bi üüs bisch du schön, denn du bruchsch khei Föhn,
bi üüs bisch du schön, jo so schön

As schneialat, as beialat as goht a khüala Wind.
Khuum bisch varussa, kheisch uf d'Schnorra und langsch diar an Grind.
Durch ds Schneerüümigskonzept vu Khuur laufts das Johr würlklich toll,
ds Kantonsschpitool isch über Wianacht pumpa, tätscha voll.
As schneialat, as beialat, dr Wind pfiiff no verreggter,
dr Nochpuur hauts mim Velo um, in dr Schneemuura schteggter.
S'isch huara glatt, im wohrschta Sinn, jetz hät doch z'Khuur aso,
dr Wunsch „A guata Rusch“ a neui Bedütig überkho.

Schpiagel, Schpiagel, an dr Wand, wer isch dr Schönscht im Land?
Und welli Frau hät d'Traumfigur? Wer macht üüs das bekannt?
SF TV schtrahlts all Johr uus, und niamert schaltet ii,
dä Fleischmarkt gängi schiints dr Schwiiz total am Arsch verbii.
Dass d'Miswahl nümma am Fernseh khunnt, das findt sie todverschissa,
drum will jetz d'Evi Widmer-Schlumpf a Rettig für dia Missa!
Sie machi das Johr sälber mit, hät sie sich anerbotta.
A Glück, dass d'Ethikkommission dä Uuftritt hät verbotta.

Will Kinder Fett am Ranza händ, wird d'Schual jetz halt bewegt,
im Zimmer, uf am Pausaplatz wird gschpörtlet wia verreggt.
Mit Liegeschtütz und Dauerläuf wird jeda Goof verwöhnt,
nu d'Minischtranta händ Dischpenz, dia sind ds Abseggla gwöhnt.

An Untersuachigskommission vum Vatikan schribt fett,
dass ds Image vu da pädophila Pfarrer glitta hätt.
Dia händ bi Gott nüt Unrechts tua, drum heg dr Papscht sii gschützt.
Khei Einziga vu all däna hegi a Kondom benützt.

Ab mora müamer nümma in d'Schual, dr Lehrermangel wirkt,
üüs isch das wurscht, denn eins isch klar, dass kheina do dra schtirbt.
Trotz allem hämmer an Idee, dass d'Schual nit kollabiart,
für üsara Campus hämmer neui Lehrer rekrutiart.
Dr Emil Räber git jetz Turna, das tät dem doch guat,
für d'Religiiga khunnt d'Uriella, dia hät das im Bluat.
Für ds Tütsch hämmiar a Koryphäa khönna importiara,
dr Hakan Yakin kann aso grad selber profitiara.
Damit dr Gimma singa lernt, git er ab mora „ mjusic“
in Mathe zeigt dr Schtappi üüs, wia d' schparsch fühunderttuusig.
Dr H.P. Lebrument khunnt au und plöfft scho wia varruggt,
er seg ab nöchscher Wucha dä, wo d'Schüalerzitiig truggt!

Sexualkund isch a heikels Fach, d'Didaktik nit ganz ohni,
drum zeigt üüs bald dia geilschta Tricks dr Silvio Berlusconi.
Und für da ganz normal Verkehr, wo uf dr Schtross passiart,
händ miar genialerwiis dr Kreisel Seppli exhumiart.